

William Marrion Branham

Ang Mensahero

Apan sa mga adlaw sa tingog sa ikapitong manolunda...

Pin 10:7

MGA LISTAHAN

1 USA KA PROPETA?

6 ANG SAAD BAHIN SA USA KA
PROPETA SA ULAHING MGA ADLAW

11 ANG SINUGDANAN

15 ANG MGA TUIG SA
IYANG PAGKABATAN-ON

29 ANG HALIGI NGA KALAYO

36 ANG MGA TINAGO NGA GIPADAYAG

42 MGA PAKISAYRAN NIINI

Ang Voice Of God Recordings, Inc. usa ka interdenominasyonal nga ministerio nga napahinungod ngadto sa pagpakaylap sa Maayong Balita ni Ginoong Jesus Cristo. Ang among tinguha mao nga kining gamay nga basahon mamahimong usa ka panalangin kanimo ug makahatag kanimo sa mas maayong panabut mahitungod sa ulahing panahon nga atong gikinabuhian.

USA KA PROPETA?

Diha sa Biblia, kanunay ang Dios nagahatud sa Iyang Mensahe ngadto sa mga tawo sa kalibutan pinaagi sa propeta sa maong kapanahonan. Nakigsulti Siya kang Moises pinaagi sa usa ka nagdilaab nga sapinit ug mihatag kaniya og sugo sa pagdala sa mga Hebreohanon kaniadto pagawas sa Egipto. Gihatag kaniadto ang makita nga Haligi nga Kalayo ug ang uban pa nga mga ilhanan aron sa pagpamatuod sa iyang ministerio. Naghatud si Juan Bautista og usa ka Mensahe kaniadto sa pag-andam sa kalibutan alang sa moabotay nga Mesias. Samtang nga ginabautismohan niya si Ginoong Jesus didto sa Suba sa Jordan, usa ka Tingog gikan sa Langit ang nagpamatuod sa sugo ngadto kang Juan sa pagpaila sa Kordero sa Dios, “Kini mao ang akong Anak nga hinigugma, nga kaniya ako adunay kalipay.” Mga tuig ang milabay, nadungog na usab ang Tingog sa Ginoo nga nagapakigsulti ngadto sa usa ka propeta sa diha nga nakigsulti Siya kang Pablo pinaagi sa usa ka makapabuta nga Kahayag, ug human niadto gihatagan kini og sugo aron iplatar ang mga kaiglesiahan diha sa kahan-ayan. Sa tibuok Bag-o ug Daang Tugon, wala gayud ang Dios nakigsulti ngadto sa Iyang katawhan nga pinaagi sa usa ka denominasyong sistema o sa usa ka relihiyosong organisasyon. Kanunay gayud Siya nga nakigsulti ngadto sa katawhan pinaagi sa usa ra ka tawo: ang Iyang propeta. Ug gipamatud-an Niya kini nga mga propeta pinaagi sa supernatural nga mga ilhanan.

Apan unsa man ang mahitungod sa karong panahon? Nagapadayag pa ba sa gihapon ang Dios sa Iyang Pulong ngadto sa mga propeta?

Aduna pa ba sa gihapon ang supernatural nga mga ilhanan? Magpadala pa ba ang Dios og usa ka pang-karong panahon nga propeta ngadto sa kalibutan? Ang tubag mao ang labing tino nga,

“Oo!”

Apan unsaon man nato pagkahibalo nga ang propeta nagatungha na? Unsa kaha ang hitsura niya? Unsa kaha siya manglihok? Unsa kaha nga ilhanan ang iyang ihatag kanato? Unsa kaha nga Kasulatan ang iyang katumanan?

Ang mga propeta sa karaang panahon mga maisogon nga mga tawo sa Dios, ug wala gayud nahadlok sa pagbarog batok sa relihiyosong mga organisasyon kaniadto. Sa tinuod, halos kanunay silang gibiyaybiy kaniadto sa mga kaparian. Gihagit ni Elias ang relihiyosong mga organisasyon sa iyang panahon, sa pag-ingon kanila kon ilhon ba sa Dios ang ilang halad, o ang sa iya. Nanagpaninggit sila. Nanagpanagna sila. Nanaglukso-lukso sila sa ibabaw sa halaran. Gipangsamaran nila ang ilang mga kaugalingon gamit ang kutsilyo. Apan wala sila dungga sa Dios. Mihangad si Elias ngadto sa Langit ug miingon, “Himoa nga mahibaloan niining adlaw nga ikaw ang Dios dinhi sa Israel, ug nga ako imong alagad, ug nga gibuhat ko kining tanang mga butanga sa imong pulong.” Gitawag niya dayon ang kalayo nga mahulog gikan sa Langit aron sunogon ang maong halad. Si Micheas nga propeta ningbarog kaniadto batok sa Hari sa Israel, ug sa tibuok pundok sa mga saserdote, sa diha nga iyang gibadlong ang Labaw’ng Saserdote nga si Sedechias tungod sa pagpanagna og bakak. Gisagpa ang nawong ni Micheas sa maong Labaw’ng Saserdote ug ang Hari nagpabilanggo kaniya tungod sa pagsulti sa kamatuoran. Bisan si Ginoong Jesus gikadumtan kaniadto sa relihiyosong

mga organisasyon sa Iyang adlaw nga ilang gilansang Siya sa krus uban sa labing daotan nga mga kriminal. Kon tinuod man ang kasaysayan, ang usa ka propeta pagadumtan gayud sa modernong denominasyong sistema, ug pagamarkahan siya nga usa ka erehes, mini nga propeta, o mas grabe pa. Apan pagadapigan gayud sa Dios ang Iyang alagad.

Kon aduna ma'y usa ka propeta sa niining modernong panahon, unsaon kaha siya pagdawat sa Iglesiang Katoliko? Sa Iglesiang Baptist? Sa Iglesiang Lutheran? Sa unsa man nga denominasyon?

Gisugo ni Ginoong Jesus ang tanan nga nagatoo Kaniya: *“Ug kining mga ilhanan maganunot kanila nga nagatoo; Sa akong ngalan pagahinginlan nila ang mga yawa; magasulti sila og mga bag-ong sinultihan; Makakupot sila sa mga bitin; ug kung makainom sila sa butang nga makahilo, dili kini makadaut kanila; pandungan nila sa ilang mga kamot ang mga masakiton, ug mangaayo sila.”* (Marcos 16:17-18). Tinuod ba kini nga Kasulatan sa karon? Kon kini dili tinuod, kanus-a man diay nawad-an og bisa ang mga Pulong sa Ginoo? Diha sa tibuok Biblia, ang mga propeta nakahimo sa pagpang-ayo sa mga masakiton, sa pagpanghingilin sa mga yawa, ug sa pagpangbuhat og mga milagro. Nagpatindog kaniadto si Moises og bitin nga tumbaga sa atubangan sa mga tawo sa Israel aron nga mangaayo sila sa maong pinaakan sa malalang mga bitin (Numeros 21:9). Si Naaman, usa ka gamhanan nga Sirianhon, miadto kang Eliseo aron nga mamaayo gikan sa sanla (II Mga Hari 5:9). Sa dihang ang usa ka ulitawo namatay tungod sa iyang pagkahulog gikan sa ibabaw nga tamboanan, gigakos siya ni apostol Pablo ug mibalik ang kinabuhi ngadto sa maong patay na nga lawas (Mga

Buhat 20:10). Aduna lamang kita og rekord bahin sa 3½ ka tuig nga kinabuhi sa atong Ginoong Jesus, apan sa pipila niadtong mga tuiga, padayon Niyang giayo ang mga masakiton. Ang mga buta nakakita. Ang mga sanla nangaayo. Ang mga bungol nakadawat sa ilang igdulungog. Ang mga bakol nakalakaw. Ang matag matang sa sakit nangaayo (Mat 4:23).

Gipamatud-an usab sa Dios ang iyang mga propeta sa ubang mga paagi gawas sa pagpang-ayo. Bisan ang pinaka-giampingan nga mga tinago sa kasingkasing nahibutyag ngadto sa niining mga tawo sa Dios. Aduna kaniadto si Haring Nabucodonosor og makapasamok nga damgo, apan dili na niya kini mahinumduman kung bahin ba gyud sa unsa kadto. Gisaysay ni propetang Daniel ngadto sa hari ang maong damgo ug ang propesiya nga nagasunod niini (Dan 2:28). Walay natago kaniadto kang Solomon sa diha nga ang Rayna sa Sheba miduol sa atubangan niya. Puno gayud si Salomon sa Espiritu nga iyang gisulti ngadto sa maong reyna ang mga pangutana nga anaa sa kasingkasing niini bisan nga *wala* pa sa rayna gipangutana ang mga niini (I Mga Hari 10:3). Gisultihan ni Eliseo kaniadto ang Hari sa Israel mahitungod sa tanang mga plano nga iya sa Hari sa Siria, bisan pa gani ang pribadong mga pulong nga gisulti sulod sa lawak-katulganan niini (II Mga Hari 6:12).

Pinaagi sa kaugalingon Niyang mga buhat, kanunay nga gipakita ni Ginoong Jesus nga kining Espiritu sa pag-ila mao ang Espiritu ni Cristo. Naila Niya ang kinaiya ni Natanael sa dihang miingon Siya, “Tan-awa ang matuod gayud nga Israelinhon, nga kaniya walay limbong!” Ug mipadayon si Jesus nga nagasulti ngadto kang Natanael kon diin siya kaniadto sa dihang nagsugilon si Felipe kaniya mahitungod sa Mesias (Juan 1:48). Pagkakita ni Natanael nga nasayran ni Jesus ang iyang kasingkasing,

dihadiha naila niya Siya nga mao ang Cristo. Sa unang higayon nga nakita ni Jesus si Pedro, gisultihan Niya siya sa ngalan sa iyahang amahan, si Jona (JUAN 1:42). Dayon gibiyaaan ni Pedro ang tanan-tanan ug misunod ngadto kang Jesus sa nahabilin niyang tibuok nga kinabuhi. Natagbo ni Jesus didto sa atabay ang Samarianhon nga babaye ug gisuginlan ang maong babaye sa mga sala niini kaniadto. Ang unang mga pulong sa maong babaye maoy, “Ginoo, nakita ko nga ikaw usa ka propeta” (Juan 4:19). Ang tanang tulo sa niining mga tawo gikan pa sa nagkalainlaing mga kahimtang sa kinabuhi, pero bisan pa niana ila sa gilayon naila si Jesus sa dihang gipakita Niya ang maong gasa sa pag-ila.

Nahanaw ba kini nga gasa sa diha nga nasulat ang katapusang panid sa Biblia? Kung nangasulat ang kining mga milagro diha sa Biblia, asa na ang mga niini sa karon? Ang propeta para sa karong panahon siguradong pagapanghimatud-an gayud pinaagi sa mga milagro.

Nahikalimot na ba ang Dios sa Iyang katawhan? Mahimo pa ba Niya sa gihapon ang pagpang-ayo sa mga masakiton? Nagapakigsulti pa ba Siya sa gihapon kanato pinaagi sa Iyang mga propeta? Nakita na ba ni kinsa man sa mga propeta ang karong panahon?

Aduna pa ba’y mga propesiya nga matuman pa lang?

ANG SAAD BAHIN SA USA KA PROPETA SA ULAHING MGA ADLAW

Ang mismong katapusang mga pulong nga nahisulat diha sa Daang Tugon nagahatag sa niini nga saad: **“Ania karon, akong ipadala kaninyo si Elias ang manalagna, sa dili pa moabot ang daku ug makalilisang nga adlaw sa GINOO: Ug iyang pabalikon ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut.”** (Mal 4:5-6)

Ang daku ug makalilisang nga adlaw sa Ginoo umalabot pa lang, busa kinahanglan nga sinsero kita nga pangitaon ang maong propeta nga si Elias. Diha sa Biblia, ang mga propeta wala nagaabot ngadto sa kadaghanang relihiyosong mga organisasyon. Nagaabot sila ngadto sa pipila lang ka pinili. Hunahunaa kung ang propeta sa Malaquias 4 miabot na, ug wala siya nailhan. Unsa kaha kon siya susama sa mga propeta sa karaang panahon, ug pipila lang ka mga tawo ang makaila kaniya? Kung kini nga propeta magabalik sa ulahing adlaw, unsaon man nato sa pag-ila kaniya? Ang tubag klaro nga makita diha sa mga Kasulatan. Aduna siya og kinaiya nga iya sa propeta. Masayud siya sa mga tinago sa kasingkasing. Magapamuhat siya og mga milagro. Ang relihiyosong mga organisasyon maninguha nga dauton siya. Apan magkaaduna gyu’y pipila ka pinili nga makaila kaniya ingon nga mao ang gisaad na nga mensahero alang sa maong adlaw.

Unsaon man nato pagkahibalo nga nakabalik na si Elias? Unsa man nga mga kinaiya ang iyang ipakita aron nga kita makaila kaniya?

Si Elias kaniadto usa ka tawo nga mahigugmaon sa kamingawan. Dagkung mga ilhanan ug mga katingalahan ang nagsunod sa iyang ministerio. Nagwali siya batok sa dautang mga butang sa iyang adlaw. Nagwali siya ilabi na batok sa imoralidad sa Rayna nga si Jezebel kaniadto. Sa dihang gikuha na si Elias paingon ngadto sa Langit diha sa usa ka carro nga kalayo, ang iyang espiritu miadto kang Eliseo. Dayon ang dagkung mga ilhanan ug mga katingalahan makita na sa ministerio ni Eliseo, ug nagwali siya usab batok sa kasalanan sa kalibutan. Ang parehong propeta nag-inusara nga ningbarug batok sa relihiyosong mga organisasyon niadtong adlaw. Gatusan ka tuig human niadto, ang mao rang espiritu mibalik nganhi sa yuta diha kang Juan nga Bautista. Si propetang Malaquias nagtagna na nga si Elias mobalik aron sa pagpaila sa Ginoo: *“Ania karon, ako nagapadala sa akong sinugo, ug siya magaadam sa dalan sa atubangan ko...”* (Malaquias 3:1). Si Juan nga Bautista mao gayud kaniadto sumala sa propesiya bahin kaniya ingon nga nagpanawag siya og mga paghinulsol sa taliwala sa mga anak sa Dios. Sama kang Elias, nagwali siya batok sa hari ug batok sa modernong relihiyosong mga organisasyon. Nagpamatuod si Ginoong Jesus nga si Juan nga Bautista mao ang propeta sa Malaquias 3 diha sa Basahon sa Mateo (11:10): *“Kay siya mao, ang hingtungdan sa nahasulat, Ania karon, igapadala ko ang akong magsasangyaw nga magaduna kanimo, nga magaadam sa imong dalan sa atubangan mo.”* Nagaingon ang Lucas 1:17 nga ang espiritu ni Elijah (Elias) mamaanaa kang Juan nga Bautista, *“Ug siya magaduna kaniya sa espiritu ug sa gahum ni Elias, sa*

pagpabalik sa mga kasingkasing sa mga amahan ngadto sa mga anak.” Apan himatikdi nga ang ikaduhang bahin sa Malaquias 4 wala pa matuman: “...*ug ang kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut.”* Kana nga bahin sa Kasulatan mamahitabo sa dili pa ang Ikaduhang Pag-abot ni Cristo.

Duha ka libo ka tuig human ni Juan nga Bautista, panahon na pud nga ang espiritu ni Elias magabalik nganhi sa yuta.

Kana nga adlaw miabot na! Sa niining kapanahonan, nakita nato nga mibalik ang espiritu ni Elias. Gibatokan niya ang modernong denominasyong sistema. Mibarug siya batok sa mga kasal-anan sa kalibutan. Nagpakita siya sa dili-maihap nga mga ilhanan ug mga katingalahan. Giwali niya ang Biblia nga pulong-sa-pulong gikan sa Genesis ngadto sa Pinadayag. Miabot na ang maong propeta sumala sa gikasaad na diha sa Malaquias 4, ug naghatud siya og usa ka Mensahe nga gikan pa sa Trono sa Makagagahum nga Dios. Ang ngalan sa nianang propeta mao si **William Marrion Branham**. Ginatawag nato siya nga “Igsoong Branham.”

“Si William Branham, nga akong gihigugma ug gitoohan nga usa ka propeta sa Dios.” Oral Roberts, inila-sa-kalibutan nga ebanghelistang ug ang nagtukod sa Oral Roberts University.

“Si William Branham miabot kanato ingon nga propeta sa Dios ug tukmang nagpakita kanato sa niining ikabaynte ka gatusan ka tuig sa mao rang mga butang nga nahipakita kanato diha sa mga Ebanghelyo...Giduaw sa Dios ang Iyang katawhan, tungod kay usa ka gamhanang propeta ang mitungha sa atong taliwala.”
Dr. T.L. Osborn, ebanghelistang Pentecostal ug batid nga manunulat.

“Sa dili pa niya iampo ang usa ka tawo, mohatag siya og tukmang detalye mahitungod sa sakit sa maong tawo,

ug sa mga detalye usab sa ilang mga kinabuhi – sa ilang lungsod nga natawhan, mga kalihokan, mga buhat – bisan ang kanhi sa ilang pagkabata. Wala gayud si Branham nasayup ni usa ka higayon gamit ang pulong sa kahibalo sa tanang mga tuig sa pag-uban-uban ko kaniya. Kana apil na, ang sa akong kahimtang, sa linibo na ka mga higayon.” Ern Baxter, ebanghelistang tigdumala sa Branham Campaigns sulod sa pito ka tuig, ug usa sa orihinal nga mga nanguna sa Britist New Church Movement.

Wala pa gayud sukad kaniadto nga naglakaw ang Ginoong Jesus Cristo dinhi sa yuta nga may usa ka tawo nga mitandog sa kalibutan sa ingon ka grabeng paagi. Gikan sa usa ka mapainubsanong sinugdanan diha sa usa ka lawak nga payag didto sa kabungtoran sa Kentucky, ngadto sa Amarillo, Texas, kon diin didto siya gikuha Pauli na ngadto sa Ginoo, walay hunong nga minarkahan ang iyang kinabuhi sa supernatural nga mga panghitabo. Pinaagi sa sugo sa Manulonda sa Ginoo niadtong 1946, ang ministerio ni Igsoong Branham mao ang aligato nga nagpadilaab sa usa ka panahon sa dakung mga rebaybal sa pagpang-ayo nga mikaylap sa tibuok Amerika ug sa tibuok kalibutan. Hangtud niining adlaw, giila siya sa Cristohanong mga magsasaysay ingon nga mao ang “amahan” ug “modelo” sa rebaybal sa pagpang-ayo niadtong mga katuigan sa 1950 nga nagpausab sa Pentecostal Church ug nagpatungha sa katapusan sa Charismatic nga kalihokan, nga sa karon mao ang nag-impluwensiya sa halos matag Protestanteng denominasyon. Bisan pa man, sama sa naandan na, ginapakaubos sa mga denominasyon ang iyang mga pagtulon-an ug ginasalikway ang iyang pagkapiniyalan.

Bisan asa siya moadto, nagpamatuod ang Dios nga si Igsoong Branham mao ang propeta sa niini nga henerasyon. Sama kang Job, nakig-estorya ang Ginoo kaniya diha sa usa ka alimpulos. Sama kang Moises, nakita

ang Haligi nga Kalayo nga mao ang nag-una kaniya. Sama kang Micheas, gibiyabiya siya sa mga kaparian. Sama kang Elias, usa siya ka tawo nga mahigugmaon sa kamingawan. Sama kang Jeremias, sinugo siya sa usa ka Manulonda. Sama kang Daniel, nakakita siya og mga panan-awon para sa umalabot nga panahon. Sama kang Ginoong Jesus, naila niya ang mga tinago sa kasingkasing. Ug sama kang Pablo, gipang-ayo niya ang mga masakiton.

Nagduaw na usab ang Ginoo sa Iyang katawhan pinaagi sa usa ka propeta. Sa mangiub nga panahon sa kasaysayan, kon diin ang moralidad nangahugno na ngadto sa pagkaubos niini nga wala pa sukad makita kaniadto ug maaninag na diha sa kapunawpunawan ang mga armas nga pangpatay og dinaghan, usa ka mapaubsanon nga tawo ang gipadala gikan sa presensiya sa Dios aron sa pagpanawag sa maong naghimalatyon na nga kaliwat ngadto sa paghinulsol.

Ang minahal nga tinun-an nga si Juan nagsulat mahitungod kang Ginoong Jesus:

Ug may uban pa usab nga daghang mga butang nga gibuhat ni Jesus, nga, kung isulat ang tagsatagsa, sa akong paghunahuna ang kalibutan dili igo nga kasudlan sa tanang basahon nga kinahanglan unta sulaton. Amen. (Juan 21:25)

Pareho ra ang mahimong isulti bahin sa kinabuhi ni Igsoong Branham. Adunay sobra sa 1,200 nga gi-teyp nga mga wali nga naglakip og linibo ka mga sugilanon mahitungod sa kinabuhi niining maisogon nga tawo. Hangtud karon padayon kita nga makadungog og bag-ong mga testimonyo mahitungod sa iyang impluwensiya diha sa mga kinabuhi sa minilyon ka mga tawo. Dili gani igong maihulagway sa niining gamay nga basahon bisan sa tipik nga paagi ang grabeng impluwensiya sa niining tawo sa Dios ngadto sa kalibutan.

ANG SINUGDANAN

“Sa diha nga gipanganak ako sulod sa usa ka gamay’ng payag didto sa Kentucky, ang Manulonda sa Ginoo misulod agi sa bintana ug nagtindog didto. Aduna niadto og usa ka Haligi nga Kalayo.”

Pasugod pa lang niadto nga ginalahus sa kaadlawon ang kangitngit sa mabugnaw nga kawanangan niadtong Abril. Ang nag-inusara, nga kahoy’ng bintana giablihan pataas aron nga ang sidlak sa kabuntagon mosulod ngadto sa gamay nga usa ra-ka-lawak nga payag. Ang usa ka robin nga langgam nga nagtugdon didto sa luyo sa bintana daw sa labi ka madasigon niining buntaga ug nagaawit kutob sa iyang mahimo. Sulod sa maong payag, usa ka batan-on pa nga si Charles Branham nagsuksuk sa iyang mga kamot diha sa iyang bag-ong paris nga ober-ol ug nagsud-ong sa iyang 15 anyos nga asawa. “Atong pagatawgon ang iyang ngalan nga William,” ang ingon sa maong amahan.

Pasulod sa bintana miabot ang usa ka supernatural nga Kahayag. Milibot ang maong Kahayag sa tibuok lawak ug mipaibabaw sa higdaanan kon diin didto ang maong bata nga bag-ohay lang natawo. Kini ang mao ra nga Kahayag nga nagdala kaniadto sa mga anak sa Hebreohanon pagawas sa Egipto. Kini ang mao ra sa gihapon nga Kahayag nga natagbo ni Pablo didto sa iyang dalan paingon sa Damasco. Ug mopadayon Kini sa paggiya sa niini nga gamay’ng masuso aron tawgon ang Pangasaw-onon ni Cristo pagawas sa Kalibutan. Kana nga Kahayag walay lain kondili mao ang Manulonda sa Ginoo, ang Haligi nga Kalayo; ug sa usa na usab ka higayon mipakita Kini ngadto sa tawo.



Ang natawhang-lugar ni William Branham, Burkesville, KY.

Ug sulod didto, sa niining gamay nga trosong payag, niadtong buntag sa ika-6 sa Abril, giablihan sa mananabang ang bintana aron nga ang kahayag modan-ag sa sulod para nga makita ni Mama ug Papa kung unsay akong hitsura. Dayon usa ka Kahayag nga sama sa unlan ang gidak-on ang nagtuyoktuyok agi sa bintana. Kini nagalingin palibot sa kon diin ako kaniadto, ug mipaubos sa higdaanan. Pipila sa mga taga-didto sa bukid nga mga tawo ang atua didto. Nanaghilak sila.

Ang maong kabus nga balay atua didto sa kabungtoran sa habagatang Kentucky, duol sa gamay nga lungsod sa Burkesville. Ang petsa niadto Abril 6, 1909. Ang mao nga bata maoy una sa napulo nga mga anak nga natawo ngadto kang Charles ug Ella Branham.

Wala magdugay mibisita na usab ang Manulonda sa Ginoo kang batan-ong William Branham.

Sa bata pa siya kaniadto, nakigsulti kaniya ang Manolunda sa unang higayon, nga nagaingon nga siya manimuyo sa iyang kinabuhi duol sa siyudad nga gitawag og New Albany. Mipauli siya sa ilang balay ug gisultihan ang iyang inahan sa kung unsay

nahitabo. Sama sa ubang inahan, wala niini kaayo gihunahuna ang maong estorya ug gipakatulog siya didto sa higdaanan aron nga mapakalma siya sa iyang kahadlok. Duha ka tuig human niadto, namalhin ang iyang pamilya ngadto sa Jeffersonville, Indiana, pipila lang ka milya gikan sa habagatang bahin sa siyudad sa Indiana nga mao ang New Albany.

Nakig-estorya na usab ang maong Manulonda ngadto sa batan-ong propeta pipila lang ka mga tuig human niadto. Usa kadto ka malinawon nga adlaw sa Septyembre nga ang mainit nga sidlak sa adlaw nagalahus ngadto sa mabulukon nga mga dahon sa tingdagdag. Nagatakiang ang mao nga bata nga ginadala ang duha ka balde sa tubig didto sa dalan pauli. Usa ka anungal ang gihikot ilalum sa iyang samdan nga tiil aron dili kini mahugawan. Milingkod siya aron sa pagpahulay ilalum sa landong sa usa ka taas nga alamo nga kahoy. Nagadagayday ang mga luha gikan sa iyang mga mata sa diha nga nagahilak siya tungod sa iyang kawala'y-palad: Ang iyang mga higala nangalingaw sa ilang mga kaugalingon sa pagpamingwit didto sa ilang lugar, ug nabilin siya nga nagasag-ob og tubig para sa iyang papa. Sa kalit lang, misugod og tuyok ang hangin diha sa kahoy nga ibabaw kaniya. Gitrapuhan niya ang iyang mga mata ug mitindog siya. Nadungog niya ang kasikas sa mga dahon nga ginahuyop sa hangin...apan wala man maghangin. Gihangad niya, ug sa tungatunga sa itaas sa maong alamo nga kahoy, may butang nga nagahuyop sa mala nga mga dahon niini.

Sa kalit lang misulti ang usa ka Tingog, “Ayaw pag-inum-inum o pagpanigarilyo o paghugawan ang imong lawas sa unsa mang paagi, adunay buluhaton nga gikasangon alang kanimo nga pagabuhaton mo pag-

hamtong ka na.” Sa kalisang gibuy-an sa maong pito-ka-tuig nga bata ang iyang mga balde ug midalagan ngadto sa iyang inahan.

Sama kang propeta Samuel, nakigsulti na pud ang Dios ngadto sa usa ka bata.

Pipila ka mga semana human niadto, nagdula siya og mga holen kauban ang iyang mas manghud nga igsoon. Usa ka talagsaon nga pagbati ang miabot kaniya. Milantaw siya didto sa Suba sa Ohio ug nakita niya ang maanindot nga tulay. Napulog-unom ka tawo ang nangahulog nga nangamatay samtang nga gitulayan ang maong suba. Nakita sa maong batang propeta ang una niyang panan-awon. Gisultihan niya ang iyang inahan, ug gisulat sa inahan ang iyang gisugilon. Milabay ang mga tuig, 16 ka mga lalaki ang nangahulog og nangamatay kini samtang nga ang Second Street nga tulay sa Louisville, Kentucky ginatukod kaniadto ibabaw sa Suba sa Ohio.

Ginapakita na sa Ginoo ngadto kaniya ang mga panan-awon mahitungod sa umalabot. Ug sama gayud sa mga propeta nga nauna kaniya, wala gayu’y pagkapakyas ang maong mga panan-awon.

ANG MGA TUIG SA IYANG PAGKABATAN-ON

Sa tibuok niyang kinabuhi, nangandoy si Igsoong Branham nga mamaatua sa kamingawan. Sa edad nga 18, mibiya siya sa Indiana para sa mga lasangnon nga kabukiran didto sa kasadpan. Ang pagpuyo niya sa Arizona wala midugay sa diha nga napugos siya nga mopauli.

Usa niana ka adlaw nakahukom ako nga mopahilayo sa niana nga tawag. Miadto ako sa kasadpan aron magtrabaho didto sa usa ka ransohan. Higala, ang Dios ingon gayud ka daku didto sama sa kung unsa Siya sa unsa man nga lugar. Hinaut nga makahatag kanimo og kapuslanan ang akong kasinatian. Pag-tawgon ka Niya, tubaga Siya.

Usa ka buntag niadtong Septyembre sa tuig 1927, akong gisultihan si mama nga moadto ako sa usa ka pang-kamping nga biyahe ngadto sa Tunnel Mill, nga mga katorse ka milya gikan sa Jeffersonville kung asa kami nagpuyo niadtong panahona. Aduna na ako'y plano nga magpa-Arizona uban sa pipila ka mga higala. Sa dihang nakabalita si Mama bahin kanako pag-usab, wala na ako didto sa Tunnel Mill kondili didto na sa Phoenix, Arizona, nga nagapahilayo gikan sa Dios sa Gugma. Ang kinabuhi sa ransohan maaayo kaaayo sa makadiyut lang nga panahon, pero madali akong napul-an niini, sama sa ubang kalipayan sa kalibutan. Pero mahimo kong ingnon dinhi, Dalaygon ang Dios, nga ang kasinatian uban ni Jesus labi pa nga nagakatam-is ug nagakatam-is sa tanang panahon ug dili ka nagakapul-an. Kanunay nga nagahatag si Jesus og hingpit nga kalinaw ug kahupayan.

Daghang higayon nga madungog ko ang hangin nga nagahuyop diha sa itaas sa mga kahoy'ng pino. Mora kini og daw sa madungog ko ang lyang Tingog nga nagapanawag kanako gikan sa kakahoyan, nga nagaingon, "Adan, hain ka?" Ang mga bitoon mora og haduol ra kaayo kanimo nga makab-ot mo sa imong mga kamot. Mora og haduol kaayo ang Dios.

Ang usa ka butang nga lahi bahin niadtong kabukiran mao ang mga dalan niini didto sa kamingawan. Pagmahitipas ka sa imong dalan, madali ka gayud nga mawala. Daghang mga higayon nga may makita ang mga turista og gagmay'ng mga bulak sa kamingawan ug mahimulag sila sa karsada aron lang nga makakuha niini. Nangasalaag sila sa kamingawan ug dili na makatultol ug usahay mamatay na lang sa kauhaw. Ingon niana usab kini sa Cristohanong dalanon – aduna ang Dios og usa ka dalan. Naghisgot Siya bahin niini diha sa Isaias, sa ika-35 nga kapitulo. Kini mao ang ginatawag nga "Dalan sa Pagkabalaan." Sa makadaghang higayon ang gagmay'ng mga kalipayan sa kalibutan mao ang nagapatipas kanimo palayo sa maong dalan. Dayon walaon niini ang imong kasinatian diha sa Dios. Pagmawala ka didto sa kamingawan, adunay mopakita usahay og usa ka lipat-sa-mata. Sa mga tawo nga himalatyon na tungod sa kauhaw, ang maong lipat-sa-mata makita nga daw sa usa ka suba o usa ka lanaw. Sa makadaghang higayon ang mga tawo manalagan ngadto niini ug modagma ngadto niini og mahibaloan na lang nga nangaligo diay sila diha sa mainit nga balas. Usahay ipakita kanimo sa yawa ang usa ka butang nga ingnon niya nga usa ka kalipayan. Usa ra kana ka lipat-sa-mata, usa kini ka butang nga dili-tinuod. Pagmaminaw ka niini makaplagan mo na lang ang kaugalingon mo nga nagatipok og mga kagul-anan diha sa imong ulo. Ayaw pagpatalinghug kaniya, minahal nga magbabasa. Toohi si Jesus nga

maoy nagahatag kanimo sa buhi nga tubig ngadto kanila nga mga gigutom ug giuhaw.

Usa ka adlaw nakadawat ako og usa ka sulat gikan sa balay nga nagaingon kanako nga ang usa sa akong igsoon nagmasakiton kaayo. Si Edward kadto, ang usa nga sunod kanako. Siyempre nagdahum ako nga dili kadto grabe, busa nagtoo ko nga siya mamahimong okey lang. Apan usa ka gabii pipila lang ka adlaw human niadto sa dihang gikan ako sa siyudad sa pag-agi ko sa kan-anan didto sa ransohan, nakita ko ang usa ka papel ibabaw sa lamesa. Gikuha ko kini. Gibasa kini, "Bill, anhi ka sa amihanan nga dapit sa sibsibanan. Importante kaayo." Pagkahuman ko basa sa sulat ako ug ang usa ko ka higala miadto didto sa maong sibsibanan. Ang unang tawo nga akong natagbo didto maoy usa ka nag-inusarang tigulang na nga tigpatrolya nga nagtrabaho didto sa ransohan. Ang iyang ngalan si Durfy, pero gitawag namo siya nga "Pop." Aduna siya og masulub-on nga nawong samtang nga nagaingon, "Billy dong, aduna ko'y dili maayong balita para kanimo." Niadtong higayona ang tig-apong miduol. Gisultihan ko nila nga usa ka telegrama ang bag-ohay lang miabot, nga nagabalita kanako sa kamatayon sa akong igsoon.

Minahal nga higala, sulod sa usa ka minuto didto dili ako makalihok. Nahaunang kamatayon kadto sulod sa among panimalay. Apan gusto kong isulti nga ang unang butang nga akong gihunahuna nga kung andam na ba siya niadto nga mamatay. Sa akong paglingi sa palibot ug milantaw ngadto sa dalag nga kabalilihan didto, midagayday ang mga luha sa akong nawong. Daw sa unsa kong nahinumduman kung unsa nga magkakuyog kaming nakigbisog kaniadto niadtong mga gagmay pa kami nga mga bata ug kung daw sa unsa kalisud kadto para kanamo.

Nag-eskwela kami kaniadto nga halos walay igong makaon. Ang mga tudlo namo sa tiil nanggawas na sa among mga sapatos ug kinahanglan namo magsul-ob og mga daan na nga amerikana nga nakabutonēs hangtud sa liog tungod kay wala kami og sinina pang-ilalum. Daw sa unsa ko nga nahinumduman usab nga usa niadto ka adlaw si Mama adunay pipila ka popcorn diha sa usa ka balde alang sa paniudto. Dili kami mangaon kaniadto nga kauban ang ubang mga bata. Dili kami makapalit sa mga pagkaon nga aduna sila. Kanunay kami mangadto sa bungtod ug didto mangaon. Mahinumduman ko ang maong adlaw nga aduna kami og popcorn, abi namo nga espesyal na kaayo kadto. Busa aron makapaniguro nga aduna ko'y bahin niini, migawas na ako sa dili pa udto ug mikuha og usa ka kumkum niini sa wala pa ang akong igsoon mikuha sa iyang bahin.

Dayon sa nagatindog ako didto nga nagalantaw sa niadtong kabalilinhon nga ningkaging sa adlaw og nadumduman ko kadtoong mga butanga ug nahibulong kung gidala ba kaha siya sa Dios ngadto sa usa ka mas maayong dapit. Dayon ang Dios nagtawag kanako pag-usab, pero sama sa naandan na, gipanguhaan kong likayan kadto.

Nangandam ako sa pagpauli para sa haya. Sa diha nga si Rev. McKinny sa Port Fulton Church, usa ka tawo nga daw sa ako nang amahan, nagwali siya sa haya og nalakbitan niya nga, "Tingali adunay pipila dinhi nga wala pa makaila sa Dios, kung aduna man, dawata Siya karon." Oh daw sa unsa ko nga gikuptan ang akong lingkoranan, nagapakigsulti na usab ang Dios. Minahal nga magbabasa, pagmanawag Siya, tubaga Siya.

Dili ko gayud mahikalimtan kung giunsa paghilak niadto sa akong luoy og tigulang na nga Papa ug Mama human sa paglubong. Gusto ko nga mobalik

ngadto sa Kasadpan pero mihangyo gyud si Mama kanako nga magpabilin mao nga sa katapusan miuyon na lang ako kung makakita ako og trabaho. Wala magdugay naka-trabaho ako didto sa Public Service Company sa Indiana.

Mga duha ka tuig human niadto samtang nga nagat-testing ako og mga metrosan sa tul-iranan niini didto sa Gas Works sa New Albany, nakahanggab ako og gas ug sulod sa pila ka semana nag-antus ako tungod niini. Giadtoan ko na ang tanang doktor nga akong nailhan. Dili ako makakuha og alibyo. Nag-antus ako sa kaaslom sa sulod sa tiyan, hinungdan sa epekto sa gas. Misamot kadto og ka-grabe. Gidala ako ngadto sa mga espesyalista didto sa Louisville, Kentucky. Sa ulahi miingon sila nga tungod kadto sa akong apendiks ug miingon pa nga kinahanglan akong operahan. Dili ako makatoo niadto tungod kay wala man ako may gibati nga sakit diha sa akong kilid. Miingon ang mga doktor nga wala sila'y mahimo alang kanako gawas kung magpa-opera ako. Sa ulahi miuyon ako nga himoon kadto pero namugos ako nga mogamit sila og anestisya nga alang lamang sa maong bahin sa lawas aron nga matan-aw ko ang operasyon.



Oh, gusto ko niadto nga may usa nga nagatindog sa tupad ko nga nakaila sa Dios. Nagatoo ako sa pag-ampo pero dili ako kabalo moampo. Busa giubanan ako sa ministro sa First Baptist Church ngadto sa lawak-operahanan.

Sa dihang gikuha na nila ako gikan sa lamesa ngadto sa akong

higdaanan, gibati ko ang akong kaugalingon nga padayon nga nagkaluya ug nagkaluya. Halos dili na mopitik ang akong kasingkasing. Nabati ko ang kamatayon nga anaa na kanako. Sigē akong nagakakabsan og pagginhawa. Nasayod ako nga miabot na ako ngadto sa katapusan sa akong panaw. Oh higala hulata hangtud nga moabot ka dinha sa makausa, nan mahunahunaan mo ang daghang mga butang nga imong nangabuhat. Nasayod ako nga wala gayud ako nanigarilyo, nag-inum-inum man o nagkaaduna og unsa man nga mahugaw'ng bisyo pero nasayod ako niadto nga dili pa ako andam nga tagbuon ang akong Dios.

Higala ko kon usa lamang ikaw ka dagaang og pormal nga miyembro sa simbahan, mahibaloan mo nga dili ka pa diay andam pagmaabot mo na ang katapusan. Busa kung mao lang kana ang imong nahibaloan bahin sa Dios, hangyoon ko ikaw mismo karon nga moluhod ug hangyoo si Jesus nga ihatag kanimo ang maong kasinatian nga natawo na pag-usab, sama sa gisulti Niya kang Nicodemo diha sa Juan kapitulo 3, ug oh daw sa unsa nga magabagting ang mga lingganay sa kalipay. Dalaygon ang Iyang Ngalan.

Misugod kadto nga nag-anam og kangitngit ang sulod sa lawak sa ospital, nga daw sa anaa kadto sulod sa mabaga nga mga kakahoyan. Madungog ko ang hangin nga nagahuyop ngadto sa mga dahon, bisan pa daw sa halayo kadto sa kakahoyan. Malagmit nga nadungog mo na ang haguros sa hangin nga nagahuyop sa mga dahon, nga nagapaduol ug nagapaduol kanimo. Nahunahuna ko, "Bueno, kini mao ang nagapaduol na nga kamatayon aron kuhaon ako." Oh! tagbuon na sa akong kalag ang Dios, misulay ako sa pag-ampo apan dili ako makahimo.

Sa nagaanam nga nagapaduol ang hangin, nagakakusog ug nagakakusog ang tunog niini. Nangagaskas ang mga dahon ug sa kalit lang, mipanaw na ako.

Ingon nga daw sa mibalik na usab ako sa usa ka gamay'ng bata nga nakatiniil, nga nagatindog sa agianan ilalum niadtong mao ra nga kahoy. Nadungog ko ang mao ra nga Tingog nga miingon, "Ayaw gayud pag-inum-inum o pagpanigarilyo." Ug ang mga dahon nga akong nadungog mao sa gihapon nga daw sa ginahuyop ang kahoy didto niadtong adlaw.

Apan sa niining higayona ang Tingog miingon, "Nagtawag Ako kanimo ug wala ikaw moadto." Gisulti kadto sa ikatulo ka higayon.

Dayon miingon ako, "Ginoo, kung Ikaw kana, tugoti akong mobalik sa kalibutan pag-usab ug iwali ko ang Imong Maayong Balita bisan gikan sa mga atop sa balay ug sa mga suok sa kadalanan. Sultihan ko ang tanan nga tawo bahin niini!"

Human sa maong panan-awon, nakaplagan ko nga nagbati ako og pag-ayo nga wala ko sukad nabati. Ang akong surgeon atua pa sa gihapon sulod sa bilding. Miabot siya ug mitan-aw kanako ug nahingangha. Mitan-aw siya nga abi niya nga patay na ako, unya miingon siya, "Dili ako usa ka tawo nga nagasimba, hanas na ako sa pagka-doktor, apan nasayod ako nga gibisita sa Dios kining bataa." Nganong nasulti man niya kadto, wala ako kahibalo. Wala na'y usa nga nagsulti og unsa man mahitungod niadto. Kung nahibaloan ko lang kaniadto kung unsa ang nahibaloan ko karon, mibangon na ako siguro niadtong higdaanan nga nagasinggit og Dalaygon ang Iyang Ngalan.

Human sa pipila ka adlaw gitugotan na ako nga makapauli sa balay apan may sakit pa ako sa gihapon ug napugos nga mogamit og antipara sa

akong mga mata tungod sa astigmatismo. Bulog ang akong ulo pagmotan-aw ako og unsa mang butang sa makadiyut.

Misugod ako sa pagpangita ug aron makaplagan ang Dios. Mibalhin-balhin ako og simbahan, sa pagpaninguha nga makakaplag og lugar diin adunay usa ka kinaraan nga pagpanawag didto sa altar. Ang subo nga bahin niadto mao nga wala ako'y nakita ni usa.

Miingon ako nga kung usa lang ako ka Cristohanon, mamahimo gyud ako nga usa ka tinuod. Ang ministro nga nakadungog kanako mihatag og komentaryo sa pag-ingon, "Karon dodong Billy, nagasugod ka na sa pagkapanatiko." Miingon ako nga kung magkaaduna man ako og relihiyon, gusto ko nga mabati gyud kini pagmoabot kini, sama lamang sa gibuhat kaniadto sa mga tinun-an.

Oh dalaygon ang Iyang Ngalan. Sa kadugayan nagkaaduna ako og relihiyon ug aduna ako niini sa gihapon, ug pinaagi sa Iyang tabang, padayon akong aduna niini.

Usa ka gabii niana giuhaw ako alang sa Dios ug alang sa usa ka tinuod nga kasinatian mao nga migawas ako didto paadto sa karaan nga pasilunganan sa luyo sa balay ug misulay sa pag-ampo. Dili ako kabalo niadto kung unsaon sa pag-ampo mao nga misugod lamang ako sa pagpakig-estorya ngadto Kaniya sama sa ginabuhay ko nga pagpakig-estorya kang kinsa man. Sa kalit lang adunay miabot nga usa ka Kahayag sa maong pasilunganan ug miporma kini og usa ka krus ug ang Tingog nga gikan sa maong krus misulti kanako sa pinulongan nga dili ko masabtan. Dayon mihawa Kini. Natangaan ako. Sa naalinaw-nawan na ako miampo ako, "Ginoo kung Ikaw kana, balik Ka kon mahimo ug makigsulti Ka kanako pag-usab." Sukad nga nakapauli na ako sa balay gikan sa ospital

nagabasa na ako sa Biblia ug nabasa ko diha sa I Juan 4, "Mga hinigugma, dili ninyo pagtoohan ang tanan nga mga espiritu, kondili sulayi sila kun iya ba sila sa Dios."

Nasayod ako nga espiritu ang nagpakita kanako ug sa diha nga miampo ako mipakita kini pag-usab. Dayon gibati ko nga daw sa adunay usa ka libo ka libra ang gisakwat gikan sa akong kalag. Milukso ako ug midalagan ngadto sa balay ug daw sa nagadalagan ako niadto sa hangin.

Nangutana si Mama, "Bill, unsa ma'y nahitabo kanimo?" Mitubag ako, "Wala ako kabalo pero sigurado ako nga nagbati ako og maayo ug kagaan." Dili na ako makapabilin pa og dugay sa balay. Kinahanglan ko nga mogawas ug modagan.

Nahibalo ako dayon nga kung gusto sa Dios nga mowali ako, pagaayohon Niya gayud ako. Busa miadto ako sa usa ka simbahan nga nagatoo diha sa pagpangdihog og lana ug naayo ako sa gilayon. Nakita ko dayon nga ang mga tinun-an kaniadto adunay butang nga kadaghanan sa mga ministro wala niana sa karon. Bautismado sa Espiritu Santo ang mga tinun-an kaniadto ug busa makapangayo sila sa masakiton ug nagapangbuhat og gamhanang mga milagro diha sa Iyang Ngalan. Busa misugod ako sa pag-ampo para sa bautismo sa Espiritu Santo ug naangkon ko kini.

Usa ka adlaw mga unom ka bulan human niadto, gihatag kanako sa Dios ang pangandoy sa akong kasingkasing. Nakigsulti Siya kanako diha sa usa ka dakung Kahayag, nga ginasultihan ako nga magwali ug iampo ang mga masakiton ug ayohon Niya sila bisan unsa pa nga balatian ang aduna sila. Misugod ako sa pagpangwali ug gibuhaton ang kon unsay gisulti Niya kanako nga pagabuhaton. Oh higala, dili ko man lang masugdan sa pagsulti kanimo kung unsa na ang tanan nga nahitabo:

Ang buta nga mga mata nakakita. Ang mga bakol nakalakaw. Nangaayo ang mga kanser, ug tanan na nga matang sa mga milagro ang nangahimo.



Usa ka adlaw didto sa tiilan sa Spring Street, sa Jeffersonville, Indiana, human niadtong duha ka semana sa rebaybal, nagapangbautismo ako og 130 ka mga tawo. Mainit kadto nga adlaw sa Agosto ug adunay mga 3,000 ka mga tawo ang atua didto. Sa diha nga bautismohan ko na niadto ang ika-17 nga tawo og sa kalit lang akong nadungog kadtong malinawon, diyutay'ng Tingog na usab ug misulti kini, "Hangad ka." Ang kawanangan daw sama sa tumbaga niadtong mainit nga adlaw sa Agosto. Wala kami niadto og unsa man nga ulan sulod sa mga tulo na ka semana. Nadungog ko ang Tingog pag-usab, ug dayon sa ikatulo na usab ka higayon miingon kini "Paghangad."

Mihangad ako ug adunay miabot gikan sa kawanangan ang usa ka daku og mahayag nga bitoon, nga ako nang nakita kaniadto sa makadaghang higayon apan wala ko lang kini mahisgotan kaninyo. Sa makadaghan akong gisultihan ang mga tawo kaniadto mahitungod sa pagpakita niini ug kataw-an lamang nila ug

moingon, "Bill, imahinasyon mo lang kana. O tingali nagdamgo ka lang." Apan dalaygon ang Dios, niadtong higayona Iyang gihimo mismo ang Iyang Kaugalingon nga makita sa tanan, tungod kay nagpaduol kaayo kadto kanako nga dili na gani ako makahimo sa pagsulti. Human sa pipila ka segundos ang milabay misinggit ako ug daghan sa mga tawo ang mihangad ug nakita ang maong bitoon diha mismo sa ibabaw kanako. Daghan ang nangakuyapan samtang ang uban nanggisiyagit ug ang uban naggidagan palayo. Dayon ang bitoon mibalik ngadto sa kawanangan ug ang dapit diin kini mibiya mga kinse ka tiil kuwadrado kadto ug kini nga dapit nagpadayon nga nagalihok-lihok ug nagatuyok-tuyok nga bahin o nga daw sa mga balud nga nagakalukot. Adunay naporma niining dapita og usa ka gamay'ng puti nga panganod ug ang maong bitoon gidawat sa niining gamay'ng panganod.

Sama ni Juan nga Bautista, ang maong propeta gipanghimatud-an diha sa mga tubig sa Pagbautismo.

Nagpadayon ang maong mga panan-awon. Gisultihan siya sa kauban niyang mga ministro nga ang iyang mga panan-awon dili gikan sa Dios. Giingnan siya nga usa ka espiritu sa yawa ang anaa kaniya. Nagpabalaka gyud kini kaayo kaniya. Ang maong palas-onon nahimong sobra na ka bug-at, mao nga miadto siya sa kamingawan aron hibaloon ang Kabubut-on sa Dios. Matinuuron siya kaayo niadto nga nagsaad siya nga dili gayud siya mobalik nga walay tubag. Didto kini kaniadto, diha sa usa ka karaang payag nga gamit sa pagpangayam, nga ang Manulonda sa Ginoo naghatag kaniya sa iyang sugo. Lakip sa uban pang mga butang, kini ang gisulti kaniya sa Manulonda: "Kung mahimo mo nga ang mga tawo motoo kanimo, ug nga sinsero sa dihang moampo

ka, walay bisan unsa man nga makabarug atubangan sa imong mga pag-ampo, bisan ang kanser.”

Ang tanang mga pagduhaduha nahanaw na. Karon anaa na kaniya ang sugo ug maisogon siya nga mipadayon. Misugod ang rebaybal sa pagpang-ayo.

Gatasan og linibo ang nanambong sa mga buluhatong Branham. Linibo ang nangaayo diha sa Ngalan ni Ginoong Jesus Cristo. Ang ubang mga ebanghelista sama kang Oral Roberts, T.L. Osborn, ug si A.A. Allen wala magdugay nagsunod kang Igsoong Branham ug misugod sa ilang kaugalingon nga mga rebaybal sa pagpang-ayo. Nagpaulan ang Ginoo sa Iyang mga panalangin ingon nga wala pa nahitabo sukad kaniadto. Ang nagapang-ayo nga kamot ni Jesus Cristo sa makausa na usab nagpanghikap sa Iyang katawhan.

“Daghang higayon akong mihilak sa kalipay tungod sa bag-ong gasa sa Dios ngadto sa iglesia diha sa atong minahal nga igsoon, William Branham, uban sa iyang makahibulongan nga gasa sa pagpang-ayo. Usa kini ka panghitabo mahitungod sa Dios nga nagapanghimo diha sa labing madagayaon nga labaw pa kay sa tanan nga arang natong mapangayo o mahunahuna (Mga Taga-Efe. 3:20), kay wala pa gayud ako nakakita o nakabasa ni bisan unsa nga mahiparang sa pagpang-ayo nga ministerio ni William Branham.”

Rev. F.F. Bosworth, inila-sa-kalibutan nga ebanghelista ug usa sa mga amahan nga nagtukod sa Assemblies of God nga denominasyon ingon man usab sa modernong Pentecostal nga kalihokan.

“Usa ka higayon, nanan-aw kami samtang nga nakig-estorya siya ngadto sa tawo nga nagahigda sa usa ka teheras. Sa una wala man lang og salabutanong tubag gikan sa maong tawo. Unya miabot ang katinawan gikan sa asawa nga nagatindog tupad niini,

nga ang maong tawo dili lamang himalatyon na sa kanser, kondili amang kini ug dili makadungog sa kung unsa ma'y ginasulti.

Miingon dayon si Igsoong Branham nga kinahanglan gayud sa maong tawo nga makadawat sa iyang igdulungog aron nga iyang matudloan siya mahitungod sa pag-ayo sa kanser niini. Aduna dayon og pag-ampo. Dihadiha makadungog na ang maong tawo! Hilabihan ka dagku ang mga luha nga midagayday sa nawong niadtong tawo kinsa ang nawong niini tibuok gabii walay makitang pagbati ug walay timik. Naminaw siya nga may kaikag gayud samtang nga gisultihan siya sa iyang kalingkawasan gikan sa maong kanser.”

Rev. Gordon Lindsay, malampuson nga manunulat, ministro, ug ang nagtukod sa Christ For The Nations Institute.

“Miingon si Igsoong Branham, ‘Ang Kongresista naayo na.’ Milukso sa kalipay ang akong kasingkasing. Miadto ako ug gidawat ang Ginoo ingon nga akong Mananambal. Akong gipadaplin ang akong mga kratsis...ug naabli ang pultahan sa Langit!”

William D. Upshaw, Kongresista sa US (1919-1927), kandidato sa pagka-Presidente sa US niadtong 1932. Nabakul sukad pa sa pagkabata niadtong nahulog siya og nabalian ang iyang likod. Siya 84 na niadto sa dihang hingpit siyang giayo tungod sa pag-ampo ni Igsoong Branham, human niadtong pagkabakul niya sulod sa 66 ka tuig. Wala na gayud siya nagkinahanglan og wheelchair o kratsis man lang sa tibuok niyang nahabiling kinabuhi.

“Sulod sa walo na ka tuig ug siyam ka bulan nga naghigda ako tungod sa T.B. ug misurender na kanako ang mga doktor. Halos 50 ka libras na lang ang gibug-aton ko ug daw sa nawad-an na ako sa tanang paglaum. Dayon gikan sa Jeffersonville, Indiana, miabot si Rev. WM Branham tungod sa usa ka panan-awon kon diin

nakita niya ang usa ka carnero nga nasabud didto sa kamingawan ug nga nagahilak og 'Milltown,' nga mao ang lugar diin ako nagpuyo. Wala pa gayud sukad nakaanhi si Igsoong Branham o may nailhan man nga taga-ania dinhi. Pagkaanhi niya, gipandungan ako sa mga kamot niya uggikaampo, nga nagapangamuyo para kanako diha sa Ngalan sa atong minahal nga Ginoong Jesus. Daw sa may butang nga misakmit kanako ug sa kalit lang mitindog ako nga nagapasalamat sa Dios tungod sa Iyang gahum sa pag-ayo. Usa ako karon ka manunugtog sa piano sa iglesiang Baptist dinhi."

Georgia Carter, sa Milltown Indiana, naayo na sa makamatay nga T.B. niadtong 1940 ug wala na sukad nag-antus sa maong sakit sa sunod nga mga adlaw sa iyang kinabuhi. Ginarepresentar niya ang napulo ka mga linibo sa mga tawong nangaayo pinaagi sa maong ministerio ug sa mga nangaayo bisan hangtud karon.

ANG HALIGI NGA KALAYO

Kanunay nga ginahulagway ni Igsoong Branham ang Haligi nga Kalayo nga maoy nagpamatuod sa iyang ministerio. Atua Kini niadtong natawo siya, nakita sa linibo ka mga tawo didto sa daplin sa Suba sa Ohio, ug ingon nga nagsunod kaniya bisan asa siya miadto. Niadtong 1950 kini nga parehong gihatag sa Ginoo ngadto sa mga magtotoo ug sa mga dili-magtotoo ang di-malalis nga pagpamatuod nga kining Haligi nga Kalayo nagauban gayud sa maong propeta.



Gabii kadto nga naputos sa kontrobersiya didto sa Sam Houston Coliseum. Ginapangunahan kaniadto ni Igsoong Branham ang usa ka rebaybal sa pagpang-ayo nga mikaylap sa tibuok kayutaan. Gibubu kaniadto ang mga panalangin ni Ginoong Jesus nga sama sa ulan diha sa espirituhanong mga umahan sa trigo. Apan ang dagku nga mga ilhanan ug mga katingalahan wala miabot nga dili-gisaway. Sama sa kanunay, nagapatindog ang kaaway og usa ka pang-kontra. Nagkatagbo ang maong duha ka puwersa didto sa Houston, Texas, ug ang Manulonda sa Ginoo Mismo ang mikanaug aron makigbugno sa maong gubat.

Linibo ang atua didto aron saksihan ang dili-maihap nga mga milagro nga nagsunod sa niining tawo sa Dios. Usa ka adlaw bag-o kadto, usa ka grupo sa lokal nga mga ministro ang mihagit sa propeta ngadto sa usa ka debate

bahin sa Balaanong pagpang-ayo, apan mipaingon ang maong hagit ngadto sa madapigon og tigulang na nga kauban sa maong propeta, si Reverend F.F. Bosworth. Ang daghan sa mga maduhaduhaon kaniadto gipangunahan sa usa ka lokal nga Baptist nga ministro ug masaba nga kritiko batok sa Balaanong pagpang-ayo. Ang maong pahaduol na nga debate nahibal-an sa mga mantalaan, nga gilayon nga gimantala diha sa mga ulohan sa balita, *“Igawarawara Unyang 7 p.m. Ang Mga Teolohikanhong Bandera. Karong Adlaw Sa Sam Houston Coliseum.”*

Nagsuhol ang mga maduhaduhaon og usa ka propesyonal nga retratista, si Ted Kipperman sa Douglas Studios, aron edukomento ang maong debate. Nianang gabhiona, ang mga retrato nangakuha nga si Igsoong Bosworth mapaubsanon nga nagatindog samtang ang madudahong tawo nagabarug diha sa mahulgaon nga mga posisyon; nga usa ka higayon ang tudlo niini nakapuntirya ngadto sa nawong sa maong mapainubsanon og tigulang na nga tawo.

Sa gisugdan na ang debate, madali nga gipamatud-an ni Reverend Bosworth ang katinoan sa Balaanong pagpang-ayo uban sa mga ebidensiya diha sa Kasulatan ug dayon, aron nga wala na’y mabilin nga pagduhaduha, gihangyo niya nga manindog ang tanan nga nangaayo sa ilang mga balatian. Linibo ang nanindog. Human nga kadtong mga nangaayo nakapanglingkod na sa ilang mga lingkuranan, gihangyo niya nga manindog kung kadtong mga nangaayo tungod sa Balaanong pagpang-ayo matitud-anon ba nga mga miyembro sa denominasyon sa niining tawo. Tulo ka gatus ka mga miyembro sa maong iglesia ang nanindog aron mapasigarbo nga ipasundayag ang kalooy nga gipakita kanila ni Ginoong Jesus.

Miabot dayon ang hagit gikan sa maong madudahong tawo. “Ipagawas kanang Balaanong mananambal. Tugoti

nga magapamuhat siya.” Giklaro ni Igsoong Bosworth nga si Jesus lamang ang Balaanong Mananambal, apan padayon ang pagpangyawyaw sa tawong maduhaduhaon. Sa kaulahian, gidapit ni Igsoong Bosworth si Igsoong Branham ngadto sa entablado. Gidawat ni Igsoong Branham ang maong pagdapit taliwala sa mga pagsinggit sa pagsuporta.

Ang propeta, nga puno sa Espiritu Santo, gihatag ang sunod nga tubag:

Dili ako makahimo sa pag-ayo ni kinsa man. Kini ang akong ikasulti. Sa diha nga usa pa ako ka bata kaniadto nga gipanganak didto sa Estado sa Kentucky, matud pa sa ako mismong minahal nga inahan, ug nga napamatud-an na diha sa tibuok kong kinabuhi, adunay usa ka Kahayag didto nga misulod sa gamay'ng karaang payag-payag, nga diin kini, wala kini salog, wala ni bisan usa ka tamboanan, aduna lamang sila og usa ka gamay'ng butang didto para bintana, susama sa usa ka gamay'ng pultahan, ug gitulod nila kini sa pag-abli sa mga alas singko sa kaadlawon, ug kining Kahayag patuyok nga misulod sa diha nga pasubang na ang adlaw. Sukad niadtong panahona, nag-uban-uban na Kini kanako. Ang Manolunda kini sa Dios. Personal Niya akong gihimamat pipila ka tuig na ang milabay. Sa tibuok kong kinabuhi, gitug-anan Niya ako sa mga butang nga mahitabo pa lang, ug gipangsulti ko kini sama gayud sa pagkasulti Niya kanako. Ug ginahagit ko ang si kinsa man sa bisan asang lugar, sa pag-adto ngadto sa siyudad nga diin ako nagdako, o bisan asa pa, nga diin usa ka pamahayag ang gihimo diha sa Ngalan sa Ginoo, nga wala natuman sa eksaktong pagkasulti niini nga mahitabo kini.

Human nga nasulti niya kadto nga mga pulong, mikunsad ang Espiritu Santo diha sa entablado, ug kalit nga mikuha og retrato ang naghinamhinam nga retratista. Mibiya si Igsoong Branham sa entablado nga may yano, pero ma-



propesiyang pamahayag: *“Dios ang magapamatuod. Dili na ako mosulti og dugang pa.”*

Ang kauban ni Mr. Kipperman dalidali nga miadto aron trabahoon ang pagpagula sa mga retrato alang sa sunod buntag nga mga balita. Nahimatikdan niya ang usa ka butang nga di-kasagaran samtang nga gihugot ang unang retrato gikan sa pagpalutaw nga solusyon niini. Kini, sama sa sunodsunod nga lima ka mga retrato, blangko. Nakapanghawid siya sa iyang dughan ug napadunghoy sa dihang gibira niya ang katapusang hulad sa imprinta gikan sa maong solusyon. Didto, niadtong katapusang retrato, ang Haligi nga Kalayo diha sa usa ka makita nga porma nga nagapaibabaw sa ulo sa propeta sa Dios, nga si William Marrion Branham.

Nasaksihan kaniadto sa mga anak sa Israel ang maong Haligi nga Kalayo nga nagapanguna kang Moises, ug ang mga tawo sa niining modernong adlaw nakasaksi sa mao mismo nga Haligi nga Kalayo nga nagapanguna sa usa na usab ka propeta.

Ang retrato dalidali nga gitugyan ngadto kang George J. Lacy, Propesyonal nga Taga-eksamen sa Gidudahan nga mga Dokumento para sa U.S. F.B.I., kinsa maoy nagpamatuod sa maong retrato uban sa iyang eksperto nga opinyon. Ang opisyal nga resultang dokumento nga gipagula ni Mr. Lacy anaa sa sunod nga pahina.

Sa kaniadto pa kini nga wala pa’y mga computer o digital nga mga kamera, ug nga dili maisaysay sa unsa man nga mga pamaagi nga nahibaloan sa siyensiya, gawas lang sa pag-ingon nga aduna gyu’y usa ka tinuod nga Kahayag sa ibabaw sa ulo ni William Branham. Karon ang kanang mao ra nga retrato makita didto sa United States Library Of Congress, didto sa kaulohan sa nasud, sa Washington DC.

George J. Lacy
Taga-eksamen sa mga Gidudahan nga mga Dokumento
Shell Building
Houston, Texas

Enero 29, 1950

P A M A H A Y A G U G O P I N Y O N

Re: Gidudahan nga Negative

Niadtong Enero 28, 1950 basi sa hangyo ni Reverend Gordon Lindsay, nga nagarepresentar kang Reverend William Branham nga taga-Jeffersonville, Indiana, gidawat ko gikan sa Douglas Studios sa 1610 Rusk Avenue niining siyudad, ang usa ka 4x5 pulgada nga nadayag ug nadebelop nga film sa retrato. Kini nga film gipahayag nga nakudakan sa taga-Douglas Studios kang Reverend William Branham didto sa Sam Houston Coliseum niining siyudad, sa panahon sa iyang pagbisita dinhi niining katapusan nga bahin sa Enero, 1950.

H A N G Y O

Si Reverend Lindsay naghangyo nga mohimo ako og usa ka siyentipikong pag-eksamen sa maong giingon nga negative. Gihangyo niya nga siguradohon ko, kung mahimo, kung sa akong opinyon kaha na-retuki ang maong negative o "giduktoran" sa unsa mang pamaagi, human sa pagka-debelop sa maong film, nga nagpatungha og badlis nga kahayag nga naglibot ibabaw sa ulo ni Reverend Branham.

P A G - E K S A M E N

Usa ka makrospiko ug mikrospikong pag-eksamen ug pagtuon ang gihimo sa tibuok atubang og likod sa maong film, nga usa ka Eastman Kodak Safety Film. Ang atubang og likod sa maong film gi-eksamen ilalum sa filtered ultra-violet light ug gihimo ang mga retratong infra-red gikan sa maong film.

Ang mikroskopikong pag-eksamen napakyas sa pagpakita nga adunay pagretuki sa film sa unsa man nga bahin niini pinaagi sa unsa mang pamaagi nga gamiton sa pang-negosyo nga pagpangretuki. Usab, ang maong mikroskopikong pag-eksamen napakyas sa pagpakita nga aduna og unsa man nga pagsamok sa emulsion sa sulod o palibot sa gidudahan nga badlis nga kahayag.

Ang ultra-violet light nga pag-eksamen napakyas sa pagpakita sa unsa man nga butang gikan sa gawas, o resulta sa unsa man nga lihok sa kemikal sa luyo'g luyo sa maong negative, nga mahimong nagpatungha sa maong badlis nga kahayag, human sa pagproseso sa negative.

Ang pagretrato niini sa infra-red napakyas usab sa pagbutyag og unsa mang butang nga magpakita nga adunay gihimo nga pagretuki sa film.

Ang pag-eksamen napakyas usab sa pagbutyag og bisan unsa man nga magpakita nga ang gidudahan nga negative maoy usa ka nagkasagol-sagol nga negative o usa ka dobleng na-expose nga negative

Walay nakita nga bisa'g unsa man nga magpatimaan nga ang maong gidudahan nga badlis nga kahayag nahimo atol sa pagdebelop. Ni adunay nakita og bisan unsa man nga magpakita nga wala kadto gi-debelop sa usa ka kasagaran ug giila na nga pamaagi. Walay nakita nga bisan unsa man sa maikumpara nga mga densidad sa kahayag niini nga dili magkaangay.

OPINYON

Basi sa gipanghulagway sa itaas nga mga pag-eksamen ug pagtuon piho kong nahukman nga ang negative nga gitugyan alang sa maong pag-eksamen, wala giretuki o usa kadto ka nagkasagol-sagol o dobleng na-expose nga negative.

Dugang pa, piho ako sa akong hunahuna nga ang makita nga badlis nga kahayag nga naglibot ibabaw sa ulo maoy tungod sa niining kahayag nga miigo sa negative.

Matinahuron nga ginasumiter,



ANG MGA TINAGO NGA GIPADAYAG

Sa sinugdan sa ministerio ni Igsoong Branham klaro niadto nga ang denominasyonghong sistema gitukod aron sa pagpalambo sa relihiyosong mga organisasyon, ug dili ang tinuod nga Ebanghelyo. Mitoo si Igsoong Branham sa Biblia nga Pulong sa Pulong, ug dili makigkompromiso, bisan pa kon kini nangahulogan nga igasalikway siya sa iyang mga kauban sa ministerio, mga higala, o pamilya.

Samtang nga miyembro pa siya sa Missionary Baptist Church, giingnan siya kaniadto sa pag-ordena og mga babaye nga mga ministro. Apan, nasayod gayud siya sa Kasulatan. Klaro nga nagaingon ang I Timoteo 2:12, *“Kay dili ako motugot nga ang babaye magpanudlo, o magbuot sa mga lalaki, kondili magpakahilum lamang siya,”* ug nagaingon ang I Mga Taga-Corinto 14:34, *“Ang mga babaye kinahanglan magpakahilum sulod sa mga iglesia; kay wala itugot kanila ang pagsulti...”* Dili kini nga batok siya sa mga babaye, apan tuman ka klaro ang Biblia mahitungod sa maong hilisgutan. Sa dihang gihatag ang maong katapusang sugyot, dili niya mahimong mouyon-uyon busa gibiyaan niya ang maong simbahan.

Dili lang kadto ang Kasulatan nga bug-os ginabaliwala sa mga denominasyon. Gipadayag kaniadto sa Ginoo kang Igsoong Branham ang kamatuoran mahitungod sa bautismo. Unsa man nga mosugo si Jesus og, *“Busa panlakaw kamo, ug panudloan ninyo ang tanang mga nasud, nga magabautismo kanila sa ngalan sa Amahan, ug sa Anak, ug sa Espiritu Santo,”* bisan pa nga ang matag bautismo nga narekord sa Biblia

diha man sa Ngalan ni Jesus? Gisugo ni apostol Pedro diha sa Mga Buhat 2:38 nga *maghinulsol ug managpabautismo sa Ngalan ni Jesus Cristo*. Ang mga Kasulatan nagapamuhat diha sa hingpit nga panaghiusa, apan nagkinahanglan kini og usa ka propeta aron sa pagbutyag niining tinago: “Amahan” dili kana usa ka ngalan, “Anak” dili kana usa ka ngalan, ug “Espiritu Santo” dili kana usa ka ngalan. Sama lang nga ang usa ka tawo maoy amahan sa iyang mga anak, nga anak sa iyang mga ginikanan, ug igsoon usab nga lalaki sa iyang mga igsoon, apan ang iyang ngalan dili “amahan,” “anak,” o “igsoon.” Amahan, Anak, ug Espiritu Santo mga titulo alang sa Ngalan nga Jesus Cristo. Ang Mateo 28:19 ug ang Mga Buhat 2:38 hingpit gayud nga nagkasinabut.

Bisan gani ang orihinal nga sala didto sa Tanaman sa Eden gipadayag, dili ingon nga pag-kaon sa prutas, kondili usa ka butang nga mas daotan. Sa unsa mang paagi nga ang pagkaon og usa kabuok nga prutas ang magpadayag sa gilayon kang Adan ug Eva nga mga hubo diay sila? Klarong dili gayud kini masabtan. Unsa ma’y kahilambigitan sa usa ka mansanas sa pagkahubo? Klaro kaayong gipadayag sa maong propeta sa Dios kini nga tinago.

Kinsa ba ang mga manulonda nga gipamulong diha sa Pinadayag kapitulo 2 ug 3? Mahimong nadungog mo na ang ilang ngalan.

Kinsa ba ang misteryosong mga nagsakay sa kabayo diha sa Pinadayag kapitulo 6? Aduna sila og usa ra ka importante kaayong butang nga pare-pareho kanila.

Nahisgotan ba ang Estados Unidos diha sa Basahon sa Pinadayag?

Kinsa ba ang mga maluwas nga 144,000 diha sa kapitulo 7?

Kinsa ba ang maong dakung bigaon diha sa kapitulo 17? Kung kinsa siya ug ang tanan niining mga tinago nangapadayag diha sa Mensahe sa niining gamhanang propeta nga pinadala gikan sa Dios.

Dili lamang nga dili-maihap nga mga milagro ang nagasunod niining tawhana, kondili ang mga tinago nga gitago diha sa Biblia sa tanang mga kapanahonan nangapadayag usab diha sa iyang ministerio. Klaro kaayo nga kining propeta maoy katumanan sa daghang mga Kasulatan kay sa Malaquias 4 lamang.

Pinadayag 10:7: Apan sa mga adlaw sa tingog sa ikapitong manolunda, sa diha nga siya buot magtingog, unya ang tinago sa Dios matuman na, sumala sa iyang gipahibalo ngadto sa Iyang mga ulipon nga mao ang mga propeta.

Usaka Tingog nga nagapanawagan ngadto sakalibutan aron sa paggawas gikan sa mga denominasyon ug aron mangbalik ngadto sa orihinal nga Pulong sa Dios. Ang matag usa kanato aduna og mao rang kahigayonan nga anaa kaniadto si Pedro, Santiago, ug Juan. Aduna kita og maong kahigayonan aron nga maapil sa pipila ka mga pinili sa Dios nga dili mangyukbo ngadto sa relihiyoso nga mga organisasyon sa niining adlaw.

Ang Balaang Kasulatan nagapangrekord sa mga kinabuhi ug mga binuhatan sa mga tawo kinsa nagalakaw kauban sa Dios ug mga dinihogan sa Iyang Espiritu nga ilang gipahayag ang MAO KINI ANG GINAINGON SA GINOO, ug ang ilang mga pulong gipamatud-an pinaagi sa dili-masayup nga mga ilhanan ug mga katingalahan. Sila ang mga propeta sa Dios, ug ang Tingog sa Dios para sa ilang henerasyon.

Lahi na ba ang mga panahon karon kay sa kung unsa kini kaniadto sa dihang dinhi pa si Jesus?

Mga relihiyosong lider kadto ang nagpalansang Kaniya. Ang mga tinun-an kaniadto usa lamang ka minoridad sa maong usa ka dakung relihiyosong sistema. Gipangsalikway sila, gipangbiaybiay, ug sa katapusan gipangpatay tungod sa pagbarug nila batok sa denominasyong sistema sa kadaghanan. Mahimong dili kita mapatay tungod sa atong mga ginatoohan karon, apan sigurado gyud kitang ginalutos. Sama kaniadto sa mga Fariseo ug mga Saduceo, dili nila mailimud ang mga milagro nga nagasunod sa ministerio ni Igsoong Branham busa migamit sila og ubang mga pag-atake. Madungog ninyo tingali nga siya matud nila usa kono ka mini nga propeta, lider sa usa ka kulto, o mas grabe pa. Sa pagkatinuod, usa siya ka mapainubsanon nga tawo sa Dios nga malig-on nga nagbarug batok sa hugot nga pagpangduminar nga aduna ang mga denominasyon ug mga kulto sa katawhan sa Dios. Giatake nila si Jesus diha sa mao ra nga paagi sa dihang ningbarug Siya batok sa ilang mga dogma ug mga tradisyon.

Gipasidunggan sa Dios si Igsoong Branham sa pagtoo niya sa matag Pulong sa Biblia, ug gigamit sa Dios ang iyang ministerio aron sa pag-agak sa minilyon nga mga kalag ngadto kang Jesus Cristo. Karon, ang Tingog sa Ikapitong Manulonda nagatingog sa ingon ka kusog sama sa kung unsa Kini kaniadto. Mga duha ka milyon ka mga tawo sa tibuok kalibutan ang nagatoo sa Mensahe ni Igsoong Branham. Kini tingali usa ra ka gamay nga minoriya sa duha ka bilyon nga nag-angkon nga mga Cristohanon, apan kanus-a ba nga ang mga katawhan sa Dios dili usa ka minoriya?

May sobra sa 1,200 ka narekord nga mga wali nga ang sulod niini mao ang Tingog nga gipropesiya diha sa

Pinadayag 10:7 nga moabot. Ang matag usa sa niining mga wali nagaabli og dugang pa nga mga tinago sa Dios. Kana nga Tingog mahimo mong maangkon kung andam ka sa pagpatalinghug Niini.

ANG PAGDESIYON ANAA RA KANIMO

Wala ni usa ka higayon nga ako nagdala og mensahe ngadto sa katawhan aron nga sila magasunod kanako, o moapil sa akong iglesia, o magsugod og pipila ka mga panagtigum ug organisasyon. Wala gayud ako nagbuhat niana ug dili magabuhat niana karon. Ako wala'y kaikag nianang mga butanga, apan ako aduna'y kaikag sa mga butang sa Dios ug sa katawhan, ug kung makahimo lamang ako og usa ka butang ako matagbaw na. Kanang usa ka butang mao nga makit-an nga nahibarug ang usa ka matinud-anon nga espirituhanong relasyon tali sa Dios ug sa tawo, kon diin ang mga tawo mahimong bag-ong mga binuhat diha kang Cristo, nga puno sa Iyang Espiritu ug nagkinabuhi nga nahiuyon sa Iyang Pulong. Ako magadapit, magahangyo ug magapasidaan sa tanan sa pagpaminaw sa Iyang tingog niining panahona, ug itugyan ang inyong mga kinabuhi sa hingpit gayud ngadto Kaniya, maingon nga ako nagasalig sulod sa akong kasingkasing nga ako nang nahitugyan ang tanan kanako ngadto Kaniya. Ang Dios magapanalangin kaninyo, ug hinaut nga ang Iyang pag-abot magalipay sa inyong kasingkasing.

Rev. William Marrion Branham

MGA PAKISAYRAN NIINI

(SI JESUS CRISTO MAO ANG DIOS (PAGKA-DIOS))

EX 20:3	Dili ka magbaton ug lain nga mga dios sa atubangan ko.
ISA 9:6	Kay alang kanato ang usa ka bata natawo, alang kanato ang usa ka anak nga lalake gihatag: ug ang kagamhanan igatungtong sa iyang abaga: ug ang iyang ngalan pagatawgon Kahibulongan, Magtatambag, Dios nga Makagagahum, Amahan nga walay Katapusan, Principe sa Pakigdait.
MAT 1:23	Ania karon, ang ulay magapanamkon, ug magaanak sa usa ka anak nga lalaki, ug pagatawgon nila ang iyang ngalan Emmanuel, nga kung hubaron, ang Dios uban kanato.
JUAN 1:1	Sa sinugdanan mao na ang Pulong, ug ang Pulong uban sa Dios, ug Dios ang Pulong.
JUAN 1:14	Ug ang Pulong nahimong unod, ug nagpuyo ipon kanato, (ug atong nakita ang iyang himaya, himaya ingon nga sa bugtong anak gikan sa Amahan,) puno sa gracia ug sa kamatuoran.
JUAN 4:24	Ang Dios Espiritu man: ug kinahanglan nga ang mga magasimba kaniya managsimba kaniya sa espiritu ug sa kamatuoran.
JUAN 5:43	Ako mianhi sa ngalan sa akong Amahan, apan wala ako ninyo dawata: kon aduna hinooy lain nga moanhi sa iyang kaugalingon nga ngalan, siya inyong pagadawaton.
JUAN 8:19	Unya sila nanag-ingon kaniya, Hain man ang imong Amahan? Si Jesus mitubag, Wala kamo makaila kanako, bisan sa akong Amahan: kung kamo nakaila pa kanako, nakaila usab kamo unta sa akong Amahan.
JUAN 10:30	Ako ug ang Amahan usa ra.
JUAN 12:45	Ug siya nga makakita kanako makakita kaniya nga mao ang nagpadala kanako.
JUAN 14:8-9	Ug si Felipe miingon kaniya, Ginoo, ipakita kanamo ang Amahan, ug igo na kana kanamo. Si Jesus mitubag kaniya, Kadugay ko nang pakig-uban kaninyo, ug wala ka pa diay makaila kanako, Felipe? Ang nakakita kanako nakakita sa Amahan; ug naunsa bang miingon man ikaw, Ipakita kanamo ang Amahan?
JUAN 20:28	Ug si Tomas mitubag ug miingon kaniya, Ginoo ko ug Dios ko.
MGA BUHAT 2:36	Busa pahibaloon sa matuod gayud ang tibook nga balay ni Israel, nga kining Jesus, nga gilansang ninyo sa krus, gibuhat sa Dios nga Ginoo ug Cristo.
MGA BUHAT 9:4-5	Ug sa napukan siya sa yuta, ug hingdunggan niya ang tingog, Saulo, Saulo, nganong ginalutos mo ako? Ug siya miingon, Kinsa ba ikaw, Ginoo? Ug miingon ang Ginoo, Ako mao si Jesus nga imong ginalutos: usa ka butang nga malisud kanimo ang pagtindak mo batok sa mga espuela.
MGA TAGA-EFE 4:5	Usa ka Ginoo, usa ka pagtoo, usa ka pagbautismo,
MGA TAGA-COL 1:13-17	Nga mao ang nagluwas kanato gikan sa gahum sa mga kangitngit, ug nagbalhin kanato ngadto sa gingharian sa iyang hinigugmang Anak: Nga kaniya nakabaton kita sa atong pagtubos, sa pagpasaylo sa atong mga sala: Nga siya mao ang dagway sa Dios nga dili-makita, ang panganay sa tanang mga binuhat: Kay diha kaniya gibuhat ang tanang mga butang, sa mga langit, ug ang ania sa yuta, mga butang nga makita ug mga dili makita, bisan ang mga trono, kun ang mga kaginoohan, kun ang mga kapunoanan, kun ang mga kagamhanan: ang tanang mga butang gipamuhat pinaagi kaniya, ug alang kaniya: Ug siya mao ang una sa tanang mga butang, ug diha kaniya ang tanang mga butang nagapadayon.

MGA TAGA-COL 2:6-9	<p>Busa maingon nga gidawat ninyo si Cristo Jesus nga Ginoo, sa ingon niana managgawi kamo diha kaniya: Nga gipagamut ug gitukod diha kaniya, ug ginapalig-on sa inyong pagtoo, bisan ingon sa gitudlo kaninyo, nga madagayaon sa pagpasalamat.</p> <p>Magmatngon kamo aron dili kamo mabihag pinaagi sa filosofia ug sa paglimbong nga walay-pulos, sumala sa gikabilinbilin nga sugilon sa mga tawo, sumala sa mga bata nga pagtolon-an sa kalibutan, ug dili sumala kang Cristo. Kay diha kaniya nagapuyo ang bug-os nga kahupnganan sa Pagka-Dios sa lawas gayud.</p>
MGA HEB 13:8	Si Jesus Cristo mao sa gihapon ang kagahapon, ug karon, ug hangtud sa kahangturan.
I JUAN 5:7	Kay adunay tulo nga nagapamatuod sa langit, ang Amahan, ang Pulong, ug ang Espiritu Santo: ug kining tulo usa ra.
PIN 1:8	Ako mao ang Alfa ug ang Omega, ang sinugdanan ug ang katapusan, nagaingon ang Ginoo, nga mao ang sa karon, ug ang sa kaniadto, ug ang sa umalabut, ang Makagagahum sa Tanan.

BAUTISMO SA TUBIG

MAT 28:19	Busa panlakaw kamo, ug panudloan ninyo ang tanang nga nasud, nga magabautismo kanila sa ngalan sa Amahan, ug sa Anak, ug sa Espiritu Santo:
MARCOS 16:16	Ang motoo ug magpabautismo maluwas; apan ang dili motoo pagahukman sa silot.
MGA BUHAT 2:38	Ug si Pedro miingon kanila, Maghinulsol kamo, ug managpabautismo ang tagsatagsa kaninyo sa ngalan ni Jesus Cristo alang sa pagpasaylo sa mga sala, ug madawat ninyo ang gasa nga Espiritu Santo.
MGA BUHAT 4:12	Ug walay kaluwasan pinaagi kang bisan kinsa pa nga lain: kay walay bisan unsa pang lain nga ngalan sa silong sa langit nga gikahatag ngadto sa mga tawo, nga pinaagi niini maluwas kita.
MGA BUHAT 8:12	Apan sa diha nga nagpanoo na sila kang Felipe sa pagmantala niya sa Maayong Balita mahitungod sa gingharian sa Dios, ug sa ngalan ni Jesus Cristo, nanagpabautismo sila, nga mga lalaki ug mga babaye.
MGA BUHAT 19:3-5	Ug siya nangutana kanila, Ngadto ba diay sa unsa ang pagbautismo kaninyo? Ug sila mitubag kaniya, Ngadto sa bautismo ni Juan. Ug si Pablo miingon, Si Juan nagbautismo sa bautismo sa paghinulsol, nga nag-agda sa katawhan, sa pagsalig niadtong moabot sa ulahi kaniya, sa ato pa, kang Cristo Jesus. Ug sa ilang pagkadungog niini, sila gipangbautismohan sa ngalan sa Ginoong Jesus.
MGA TAGA-EFE 4:5	Usa ka Ginoo, usa ka pagtoo, usa ka bautismo,
MGA TAGA-COL 3:17	Ug bisan unsay inyong pagabuhaton sa pulong o sa buhat, buhata ang tanan sa Ngalan sa Ginoong Jesus, nga magahatag kamo sa mga pagpasalamat ngadto sa Dios ug sa Amahan pinaagi kaniya.

MGA PAKISAYRAN NIINI

MGA PROPETA

NUM 12:6	Ug siya miingon, Patalinghugi ninyo karon ang akong mga pulong: Kung adunay usa ka manalagna sa taliwala ninyo, ako nga GINOO magapakita kaniya sa usa ka panan-awon, ug ako makigsulti kaniya pinaagi sa usa ka damgo.
DEUT 18:21-22	Ug kung mag-ingon ka sa imong kasingkasing: Unsaon namo pag-ila sa pulong nga wala igasulti sa GINOO? Sa magsulti ang usa ka manalagna sa ngalan sa GINOO, kung ang butang dili matuman, ni mahitabo, mao kana ang butang nga wala isulti sa GINOO, ang manalagna nagapangahas sa pagsulti niini: dili ka mahadlok kaniya.
I CRON 16:20-22	Ug sila nanlakaw gikan sa usa ngadto sa usa ka nasud, ug gikan sa usa ka gingharian ngadto sa laing katawohan; Wala tumugot siya nga bisan kinsa magapasakit kanila: oo, iyang gibadlong ang mga hari tungod kanila, Nga nag-ingon, Ayaw paghilabti ang akong mga dinihog, ug ayaw pagbuhat ug dautan sa akong mga manalagna.
SALMO 105:12-15	Sa diyutay pa ang gidaghanon nila; oo, diyutay gayud, ug sila mga dumuloong didto. Ug nanglangyaw sila gikan sa usa ka nasud ngadto sa usa ka nasud, gikan sa usa ka gingharian ngadto sa usa ka katawohan; Wala siya motugot nga may bisan kinsa nga magasakit kanila: oo, gibadlong niya ang mga hari tungod kanila, Nga nagaingon, Dili mo paghilabtan ang akong mga dinihog, Ug ayaw pagbuhata ang kadautan sa akong mga manalagna.
AMOS 3:7	Sa pagkamatuod ang Ginoong DIOS dili magbuhat sa bisan unsa, gawas kung ang iyang tinago ipadayag niya sa iyang mga alagad, ang mga manalagna.
MAL 4:5	Ania karon, akong ipadala kaninyo si Elias ang manalagna sa dili pa moabut ang daku ug makalilisang nga adlaw sa GINOO.
LUCAS 1:70	Ingon sa iyang gisulti pinaagi sa baba sa iyang mga balaan nga manalagna, sukad pa sa karaang panahon:
LUCAS 24:25	Ug siya miingon kanila, Ay mga tawong buangbuang, ug mga maluya og kasingkasing sa pagtoo sa tanang giingon sa mga manalagna:
MGA BUHAT 7:52	Kinsa ba sa mga manalagna ang wala lutosa sa inyong mga ginikanan? ug ilang gipamatay kadtong mga nagmantala una sa pag-abot sa Matarung; kang kinsa kamo karon nahimong iyang mga magbubudhi ug mga mamumuno:
MGA BUHAT 24:14	Apan kini akong isugid kanimo, nga sumala sa dalan nga ilang gitawag og pundok, ako nagasimba sa Dios sa among mga ginikanan, ug nagatoo sa tanan nga nahimutang diha sa kasugoan o nahisulat diha sa mga profeta:
MGA TAGA-EFE 2:20	Kamo mga tinukod ibabaw sa patukoranan nga mao ang mga apostoles ug mga profeta, nga niini si Jesus Cristo mao ang ulohang bato sa pamag-ang;
MGA HEB 1:1-2	Ang Dios, sa daghan ug nagkalainlaing mga paagi misulti kaniadto sa karaang kapanahonan ngadto sa atong mga ginikanan pinaagi sa mga profeta, apan niining kaulahiing mga adlaw siya misulti kanato pinaagig Anak, nga iyang gitudlo nga manunod sa tanang mga butang, pinaagi kang kinsa usab gibuhat niya ang kalibutan;

MGA MILAGRO / BALAANONG PAGPANG-AYO

DEUT 26:8	Ug gikuha kami sa GINOO gikan sa Egipto nga adunay kamot nga kusgan, ug sa bukton nga tinuy-od, ug may dakung pagkamakalilisang, ug may mga ilhanan, ug may mga katingalahan:
MGA HUKOM 6:13	Ug si Gedeon miingon kaniya, Oh Ginoo ko, kung ang GINOO nagauban kanamo, ngano man lagi nga kining tanan nahitabo kanamo? Ug hain na man ang tanan niyang mga katingalahang buhat nga gisugilon kanamo sa among mga amahan, nga nagaingon, Wala ba ang GINOO magkuha kanamo gikan sa Egipto? Apan karon ang GINOO nagsalikway kanamo, ug nagtugyan kanamo ngadto sa kamot ni Madian.
SALMO 103:3	Nga mao ang nagapasaylo sa tanan mong kasal-anan; Nga mao ang nagaayo sa tanan mong mga balatian;
ISAIAS 53:5	Apan siya ginasamaran tungod sa atong kalapasan, siya napangos tungod sa atong mga kasal-anan: ang silot sa atong pakigdait diha sa ibabaw niya; ug tungod sa iyang mga labod kita nangaayo.
DANIEL 11:32	Ug kadtong magabuhat sa dautan batok sa tugon; iyang hugawan pinaagi sa mga pag-ulo-ulo: apan ang katawohan nga nakaila sa ilang Dios mahimong makusganon, ug makakab-ut sa dagkung mga butang.
MARCOS 16:17-18	Ug kanila nga motoo maganunot kining maong mga ilhanan; Sa akong ngalan ilang pagulaon ang mga yawa; magasulti sila'g mga bag-ong sinultihan; Makakupot sila'g mga bitin, ug kon makainom sila'g bisan unsa nga makahilo, dili sila mangadaut; ang mga masakiton pagapandongan nila sa ilang mga kamot, ug nangaayo sila.
JUAN 14:12	Sa pagkatinuod, sa pagkatinuod, magaingon ako kaninyo, Nga ang nagatoo kanako, magahimo usab sa mga buhat nga akong ginabuhat; ug labi pa gani ka dagkung mga buhat kay niini ang iyang pagabuhaton; kay moadto man ako sa Amahan.
MGA BUHAT 19:12	Nga tungod niana ang mga masakiton gipanagdad-an og mga panyo o mga tapis, nga nahidapat sa lawas ni Pablo, ug sila nangaayo sa ilang mga sakit ug namahawa kanila ang mga espiritu nga dautan.
I MGA TES 1:5	Kay ang among Maayong Balita miabut kaninyo dili sa pulong ra, kondili inubanan usab sa gahum, ug sa Espiritu Santo, ug sa dakung pagsalig; kamo nasayud unsang pagkatawhana kami diha sa inyong taliwala tungod kaninyo.
SANTIAGO 2:18	Apan, kaha adunay moingon, Ikaw adunay pagtoo, ug ako adunay mga buhat: Ipakita mo kanako ang imong pagtoo nga walay mga buhat, ug ako magapakita kanimo sa akong pagtoo pinaagi sa akong mga buhat.
SANTIAGO 2:20	Apan buot ba ikaw nga masayud, Oh tawo nga walay pulos, nga ang pagtoo sa mahabulag sa mga buhat patay?
SANTIAGO 5:14-15	Nagmasakiton ba ang uban kaninyo? Tawgon niya ang mga anciano sa iglesia; ug mang-ampo sila alang kaniya, nga hidhiran siya sa lana tungod sa ngalan sa Ginoo: Ug ang pag-ampo sa pagtoo magaluwas kaniya nga nagamasakiton, ug pagabangonon siya sa Ginoo; ug kung nakasala siya, pagapasayloon siya niana.
SANTIAGO 5:16	Busa magsinugiray ang usa ug usa kaninyo sa inyong mga sala, ug mag-ampo ang usa alang sa usa, aron mangaayo kamo. Ang pagpangamuyo sa usa ka tawong matarung daku og kahimoan sa magbuhat niini.
I PEDRO 2:24	Nga siya sa iyang kaugalingon mao ang nagdala sa atong mga sala sa iyang lawas ibabaw sa kahoy, aron kita, nga sa nangamatay ngadto sa sala, mabuhi kita ngadto sa pagkamatarung: tungod sa mga samad niya nangaayo kamo.

MGA PAKISAYRAN NIINI

(ESPIRITU NI ELIAS)

II MGA HARI 2:15	Ug sa pagkakita kaniya sa mga anak nga lalake sa mga manalagna nga didto sa Jerico atbang kaniya, sila ming-ingon, Ang espiritu ni Elias nagapuyo kang Eliseo. Ug sila nangadto sa pagtagbo kaniya, ug mingyukbo sa ilang kaugalingon sa yuta sa atubangan niya.
ISAIAS 40:3-4	Ang tingog sa usa nga nagasinggit, Andama ninyo sa kamingawan ang dalan sa GINOO, himoang patag sa kamingawan ang usa ka halapad nga dalan alang sa atong Dios. Ang tagsatagsa ka walog pagabayawon, ug ang tagsatagsa ka bukid ug bungtod pagapaubson: ug ang dili patag pagahimoong patag, ug ang mga dapit nga gansanggansangon mapatag:
MAL 3:1	Ania karon, ako nagapadala sa akong sinugo, ug siya magaandam sa dalan sa atubagan ko: ug ang Ginoo, nga inyong gipangita, moabut sa hinanali sa iyang templo, ug ang sinugo sa tugon, si kinsa inyong gitinguha: ania karon, siya moabut na, nagaingon ang GINOO sa mga panon.
MAL 4:5-6	Ania karon, akong ipadala kaninyo si Elias ang manalagna sa dili pa moabut ang daku ug makalilisang nga adlaw sa GINOO: Ug iyang pabalikang ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut.
MAT 11:10 (Marcos 1:2, Lucas 7:27)	Kay siya, mao ang hingtungdan sa nahasulat, Tan-awa, igapadala ko ang akong magsasangyaw nga magauna kanimo, siya mao ang magaandam sa imong dalan sa atubangan mo.
MAT 11:14	Ug kung buot kamo magdawat kaniya, siya mao kadtong Elias, nga umalanhi.
MAT 17:11-12	Ug mitubag si Jesus ug nag-ingon kanila, oo matuod nga si Elias moanhi, ug magapahauli sa tanang mga butang. Apan nagaingon ako kaninyo, Nga si Elias nahianhi na, ug wala nila hiilhi, apan gibuhat kaniya ang tanan nga buot nilang pagabuhaton. Ingon man usab ang Anak sa tawo pagapaantuson nila.
LUCAS 1:17	Ug siya magauna kaniya diha sa espiritu ug sa gahum ni Elias, aron sa pagpabalik sa mga kasingkasing sa mga amahan ngadto sa mga anak, ug sa mga masupilon ngadto sa kaalam sa mga matarung; aron sa pagtagana alang sa Ginoo usa ka katawhan nga inandam.
LUCAS 3:4 (Mat 3:3, Marcos 1:3, Juan 1:23)	Ingon sa nahasulat sa basahon sa mga pulong ni Isaias nga manalagna, nga nagaingon, Ang tingog sa usa nga nagasinggit sa kamingawan, Andama ninyo ang dalan sa Ginoo, tul-ira ninyo ang iyang mga agjanan.

Para sa dugang pa nga kasayuran mahitungod sa ministerio ni Reverend William Marrion Branham ug unsaon sa pagpakabaton sa iyang mga wali, palihug og kontak:

www.angmensahe.org

o

Voice Of God Recordings Inc.

019 St. Mary St., Barangay E. Rodriguez Sr.
Cubao, Quezon City, Metro Manila, Philippines
www.branham.org

www.angmensahe.org

CEBUANO
